

Communicaziun allas medias, Tinizong/Casti, igls 30 d'avost 2016

## Surses lascha examinar ena skizza legendara da Segantini

**Durant blers onns è ena skizza da Giovanni Segantini stada deponada nunobservada ainten en schler a Savognin. Per la festa Segantini igls 17 e 18 da settember ins ò ossa la pigliada notiers puspe. Igl cumegn da Surses vot lascher examinar scientificamaintg igl documaint e lascher stimar la valeta.**

Blers da Savognin òn gio santia dalla skizza e dalla sia istorgia. Giovanni Segantini tgi ò vivia igls onns 1886 anfignen 1894 a Savognin, vegia da lez taimp offeria da restructurar la fatscheda dalla baselgia da Nossadonna - chegl gratuitamaintg scu rancunaschientscha per la hospitalitad e curtascheia ratscheta. Chels da Savognin vegian pero refuso la purscheida percheigl tgi vevan tema d'aveir da surpiglier igls costs per la calour. Cun chella decisiun on els desistia ad en'ovra tgi vess oz ena valeta nunpaebila.

I exista daveiras ena skizza tgi demossa igl portal d'antrada dalla baselgia da Nossadonna restructuro. Chella skizza è neida cattada giun schler sot la sala Segantini a Savognin, tranter otras utensilias, a caschung da retschertgas per la festa da Segantini. Gl'è pero betg cumprovo digltotafatg schi igl sboz è propi nia elaboro da Giovanni Segantini.

Sulettamaintg ena notiztga scretga a mang dad en C. Peterelli sen la skizza remartga, tgi chella seia neida stgaffeida „digl pictour Segantini igl anviern 1889“. Ainten en protocol digl cumegn or digl onn 1889 stat pinavant l'indicaziun tgi igl „pictour Segantino“ (sic!) vegia survagnia en rabat da 15 francs sen la lenna dad arder; chegl per aveir furnia gratuitamaintg en plan per colorar la fatscheda vers nord dalla baselgia da Nossadonna.

Per tot gl'oter na dattigl pero nigns mussamaints. Percheigl vot igl cumegn da Surses lascher sclareir ossa la tgossa. El ò incumbenzo Beat Stutzer, igl conservatur digl museum da Segantini a Son Murezza, da far ena examinaziun scientifica digl documaint. Chella duess mussar schi la skizza è propi neida stgaffeida da Segantini, tge valeta tgi ella ò e tge maseiras da conservar tgi dovra per la mantigneir. „Schi la skizza è veritabla, fiss ella scu « art ainten la construcziun » la suletta ovra da Segantini cun ena relaziun evidentata cun Savognin“, dei Stutzer.

### Exposiziun alla festa Segantini

En replicat dalla skizza vign musso la dumengia, igls 18 da settember, avant la baselgia da Nossadonna a Savognin. Ella furma ena part dalla ronda dalla festa Segantini, sen la quala igl parc Ela lascha reveiver puspe an 20 lis originals la veta e la labour da Segantini cun citats, istorgias, maletgs e fotografias. Daple infurmaziuns davart la festa Segantini dattigl sen [www.parc-ela.ch/segantini](http://www.parc-ela.ch/segantini).

## Fotografia:



La skizza dalla baselgia da Nossadonna tgi deriva prubablamaintg da Segantini vign ossa examinada scientificamaintg.

## Ulteriouras infurmaziuns:

Mastral Leo Thomann, telefonign no 079 405 96 73

## Infurmaziuns dalla festa Segantini e biglets gratuits per collaboratours da medias:

Judith Burri, manadra da project comunicaziun, events ed intermediaziun dall'uniun Parc Ela, judith.burri@parc-ela.ch, 081 508 01 22